

Huw Irranca-Davies AS/MS
Y Dirprwy Brif Weinidog ac Ysgrifennydd y Cabinet dros
Newid Hinsawdd a Materion Gwledig
Deputy First Minister and Cabinet Secretary for Climate
Change and Rural Affairs



Llywodraeth Cymru
Welsh Government

Eich cyf/Your ref P-06-1472
Ein cyf/Our ref HIDCC/10183/24

Carolyn Thomas AS
Cadeirydd - Y Pwyllgor Deisebau

30 Medi 2024

Annwyl Carolyn,

Diolch am eich gohebiaeth ar 6 Medi ynghylch "Deiseb P-06-1472 Rhaid diogelu ein bywyd gwyllt ... dylid gwahardd glaswellt plastig yng Nghymru!".

Rwy'n rhannu'r pryderon a amlinellir yn y ddeiseb mewn perthynas â microblastigau. Credaf fod lleihau defnydd cymdeithasol o blastigau yn hanfodol, er mwyn helpu i ddiogelu'r amgylchedd, bioamrywiaeth ac iechyd pobl. Gan fod microblastigau yn tarddu o ystod o wahanol ffynonellau, gan gynnwys gweithgareddau diwydiannol a domestig, mae gennym sawl strategaeth bresennol (DS - cyfeirir at rai o'r rhain yn yr ymateb e-bost a atodwyd gennych - y Strategaeth Economi Gylchol er enghraifft) ymrwymedig sydd ag agwedd benodol sy'n seiliedig ar dystiolaeth i fynd i'r afael â'r mater.

Er mwyn helpu i gydlynu ein hymateb i'r heriau hyn ac i lywio polisi Llywodraeth Cymru yn y dyfodol, rwyf wedi gofyn i'm swyddogion weithio gyda Platfform yr Amgylchedd Cymru i drefnu digwyddiad microblastigau yr hydref hwn. Ein nod yw dwyn ynghyd arbenigedd gwyddonol yn y maes hwn i'n helpu i ddeall pa ymchwil sy'n cael ei wneud ac i nodi unrhyw fylchau presennol o ran dealltwriaeth.

Ein nod yw symud tuag at economi fwy cylchol yng Nghymru, lle mae llygredd plastig ynghyd â phob math arall o wastraff yn cael ei osgoi, a lle mae adnoddau'n cael eu defnyddio cyhyd â phosibl fel rhan allweddol o'n camau gweithredu ar yr argyfwng hinsawdd a natur. Wrth wneud hynny, mae'n hanfodol ystyried cylch oes cyfan cynhyrchion fel glaswellt artiffisial. Wrth gyflwyno Cyfrifoldeb Estynedig Cynhyrchydd am gynhyrchion fel deunyddiau pecynnu, rydym yn pwysleisio'r rôl y gall gwelliannau o ran dylunio a deunyddiau a ddefnyddir ei chwarae i helpu i wella effeithlonrwydd adnoddau, lleihau llygredd, a chefnogi'r broses o ailweithgynhyrchu ac ailgylchu deunyddiau. Mae ein strategaeth Mwy nag Ailgylchu hefyd yn cynnwys ymrwymadau i leihau i sero faint o blastig sy'n cael ei waredu mewn safleoedd tirlenwi a lleihau faint o wastraff plastig sy'n cael ei anfon dramor.

Mae Llywodraeth Cymru wedi ymrwymo i fynd i'r afael â'r Argyfwng Natur a gwella bioamrywiaeth, sy'n sail i'n hiechyd, ein heconomi a'n lles. Byddai plannu glaswellt o

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Gohebiaeth.Huw.Irranca-Davies@llyw.cymru
Correspondence.Huw.Irranca-Davies@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

rywogaethau cymysg yn lle defnyddio glaswellt artiffisial, yn helpu i amsugno carbon ac yn darparu cynefin i fywyd gwyllt.


Mae'n bwysig meithrin dealltwriaeth a chodi ymwybyddiaeth o bwysigrwydd bioamrywiaeth ac effaith camau gweithredu penodol. Mae hyn yn cael ei gydnabod yn ein dull deddfwriaethol a pholisi o ymdrin â bioamrywiaeth. Er enghraifft, un o brif amcanion ein Cynllun Gweithredu Adfer Natur yw gwella dealltwriaeth a chodi ymwybyddiaeth o fioamrywiaeth. Mae hyn hefyd yn un o nodau allweddol y Ddyletswydd [Bioamrywiaeth a Chydnerthedd Ecosystemau](#) Adran 6 a gyflwynwyd gan Ddeddf yr Amgylchedd (Cymru) 2016 sy'n ei gwneud yn ofynnol i awdurdodau cyhoeddus integreiddio ystyriaethau bioamrywiaeth ac ecosystemau yn eu holl swyddogaethau a gweithgareddau. Mae'r ddyletswydd adran 6 yn berthnasol i awdurdodau cyhoeddus, ond drwy eu swyddogaethau, gallant gael dylanwad mawr ar y sector preifat a'r trydydd sector, wrth benderfynu ar geisiadau cynllunio er enghraifft. Yn ogystal â chymhwyso'r ddyletswydd yn gyffredinol, mae'r gofyniad i gynnwys bioamrywiaeth yn y broses gwneud penderfyniadau yn cael ei ategu'n benodol trwy Bolisi Cynllunio Cymru. Mae hwn yn nodi "na ddylai unrhyw ddatblygiad beri colled sylweddol o ran cynefinoedd neu boblogaethau rhywogaethau, yn lleol nac yn genedlaethol a rhaid i'r datblygiad weithio ochr yn ochr â natur a bod o fantais net i fioamrywiaeth" (paragraff 6.4.5). Felly, mae gan y system gynllunio gyfrifoldeb allweddol o ran sicrhau canlyniadau bioamrywiaeth cadarnhaol pan gynigir datblygiadau newydd ac i hyrwyddo ymddygiadau a chanlyniadau mwy cynaliadwy lle bynnag y bo modd.

Wrth edrych tua'r dyfodol, bydd camau i annog newid ymddygiad a chodi ymwybyddiaeth o'r hyn y gall sefydliadau ac unigolion ei wneud i helpu bioamrywiaeth yn rhan o'r cynllun gweithredu i roi Argymhellion yr Archwiliad Dwfn ar waith (cyfres o gamau gweithredu ar y cyd y gallwn eu cymryd yng Nghymru i gefnogi adferiad natur). Hefyd, rydym wrthi'n datblygu deddfwriaeth sylfaenol i gynnwys fframwaith i osod targedau adfer natur statudol manwl a fydd yn cryfhau ymhellach ein gweithredoedd i fynd i'r afael â'r argyfyngau natur a'r hinsawdd.

Mae Llywodraeth Cymru yn annog sefydliadau sy'n rheoli ardaloedd glaswelltog fel ymylon a pharciau i fod yn fwy ystyrlon o safbwynt torri gwair. Rydym wedi gweithio gyda dy hun ac is-grŵp y Cynllun Gweithredu ar gyfer Pryfed Peillio i ddatblygu'r ymgyrch 'Iddyn Nhw' i egluro y gall newid arferion torri gwair mewn mannau gwyrdd greu cynefin gwell 'Iddyn Nhw': sef infertebratau, adar, mamaliaid bach, amffibiaid ac ymlusgiaid. Mae pecyn cymorth yr ymgyrch yn cynnwys ffeithlun, Cwestiynau Cyffredin a thempledi arwyddion y gall sefydliadau eu teilwra gyda'u logos a'u manylion cyswllt. Mae pecyn addysg ar gael hefyd sy'n cynnwys taflenni lliwio a gweithgareddau i helpu plant i ddysgu am rai o'r anifeiliaid a'r planhigion a allai fod yn byw a bwydo yn yr ardaloedd hyn.

Mae gan y [llyfryn Plannu ar gyfer Pryfed Peillio gan y Cynllun Caru Gwenyn](#) awgrymiadau defnyddiol ar sut y gall pobl helpu pryfed peillio, gan gynnwys sut i gynnal lawntiau ac ardaloedd glaswelltog eraill.

Yn gywir,



Huw Irranca-Davies AS/MS

Y Dirprwy Brif Weinidog ac Ysgrifennydd y Cabinet dros Newid Hinsawdd
a Materion Gwledig

Deputy First Minister and Cabinet Secretary for Climate Change and Rural Affairs